

**PEMBERITAHUAN PERTANYAAN DEWAN RAKYAT  
JAWAPAN OLEH YB DATUK SERI DR.S.SUBRAMANIAM  
MENTERI KESIHATAN MALAYSIA**

**PERTANYAAN : LISAN**  
**DARIPADA : YB DATO' SERI TIONG KING SING [BINTULU]**  
**TARIKH : 23 NOVEMBER 2015**  
**SOALAN :**

**YB Dato' Seri Tiong King Sing [ Bintulu ] minta MENTERI KESIHATAN menyatakan :-**

- (a) adakah Kementerian berhasrat untuk menambah peruntukan kepada setiap Jabatan Kebajikan Sosial Hospital terutamanya Hospital Bintulu yang sentiasa kekurangan peruntukan untuk menghantar pesakit ke Hospital Umum Sarawak untuk mendapatkan rawatan pakar;
- (b) apakah perancangan Kementerian untuk menaiktaraf Hospital Bintulu dengan menambah kemudahan dan peralatan perubatan yang canggih serta penambahan pakar-pakar perubatan memandangkan Bintulu merupakan sebuah kawasan perindustrian berat.

**Tuan Yang di-Pertua,**

Antara peranan Pegawai Kerja Sosial Perubatan (PKSP) di hospital dan klinik kesihatan adalah membuat penilaian sosio-ekonomi ke atas pesakit dan waris pesakit yang dirujuk oleh Pegawai/ Pakar Perubatan hospital dan klinik. Tujuan penilaian sosio-ekonomi dibuat bagi

menentukan kelayakan pesakit dan waris pesakit untuk mendapatkan peruntukan kewangan yang disediakan oleh Kementerian Kesihatan Malaysia (KKM) untuk membantu golongan pesakit dan waris pesakit yang kurang mampu dan miskin termasuk menghantar pesakit ke Hospital Umum Sarawak untuk mendapatkan rawatan pakar. Pada tahun 2014 seramai 424 orang pesakit dari Hospital Bintulu telah dihantar ke Hospital Umum Sarawak melalui Jabatan Kerja Sosial Perubatan.

PKSP di hospital dan klinik tidak menerima peruntukan terus dari KKM kerana peruntukan disalur terus ke Bahagian Kewangan.

**Tuan Yang di-Pertua,**

Pihak KKM sentiasa prihatin terhadap pesakit yang memerlukan rawatan di fasiliti-fasiliti KKM. Pada tahun 2015 (sehingga September), seramai 249 orang pesakit yang mendapat rawatan di Hospital Bintulu telah dirujuk ke Hospital Umum Sarawak dengan diiringi 91 orang pengiring sosial untuk rawatan lanjut yang melibatkan jumlah perbelanjaan sebanyak RM169,015.00. Pihak KKM akan memastikan peruntukan mencukupi untuk Hospital Bintulu bagi tujuan menghantar pesakit untuk mendapatkan rawatan di Hospital Umum Sarawak.

Hospital Bintulu merupakan hospital berpakar major dengan kapasiti 292 katil (BOR; 73.09%) yang menawarkan sepuluh (10) kepakaran perkhidmatan kesihatan. Selaras dengan kemajuan bandar Bintulu sebagai sebuah bandar industri, Projek pembinaan Unit Rawatan Kebakaran telah dibina bermula dalam Rancangan Malaysia ke-9 yang melibatkan kos sebanyak RM8.6 juta. Kemajuan projek setakat Ogos

2015 adalah 87.18% dan dijangka siap pada tahun 2016. Pegawai-pegawai perubatan dan pakar perubatan akan ditambah mengikut keperluan setelah projek ini siap sepenuhnya.

Untuk pelan jangka panjang, kerajaan akan terus berusaha untuk menaiktaraf kemudahan dan fasiliti di Hospital Bintulu seperti penambah-baikan Klinik Pakar, penambahan bilangan katil selaras dengan keperluan semasa dan sumber kerajaan yang ada seperti peruntukan kewangan dan lain-lain.